

吉安府志卷十七

學校志

安福縣學校

安福縣學宋元豐四年辛酉知縣李康成建於縣治東南
百三十步伍誥記

記云以學處天下之士而教之有序取之有法此二帝
三王之所同然而於周為至備蓋自塾序達之於天子
之學而養之以道也小至於射御書數大至於受成訊
馘故士之自幼及長其見聞服習無非可以從政者此
其為教之之序也書之以月吉校之以歲時興之以大
比而賓之以鄉成皆行全材美入可以長而出可以治

吉安府志

卷十七

安福學校

一

非特閱實其一日之長而後用之此其為取之之法也
由先王之迹熄而學之興廢無與於後世之治徒以釋
奠孔子為之廟又不能徧舉於四時而州縣所不敢遂
廢者以應令耳其詔相薦徹進退降興士大夫不能深
明禮意而不知所以舉行之者皆無其人也夫釋奠釋
菜禮之小者耳其殘缺若此則士何賴於學而所謂絃
歌舞象又吏道之所不先而籩豆簋簠亦詩書之所不
急故仁宗慶厯中嘗詔州縣立學而吏或不能祇順上
意有志之士莫不嘆悲於茲焉安成之學距今廳東南
無百步其繪塑污滅頽折而不備於彩其器數缺亡而
不足於用周視其宇則旁穿上䟽殆不可蔽風雨每歲

春秋祭祀則人迹有不能及尚何以盡報本之事哉縣令李侯之至也未及他事即慨然以為憂於是邑之學士相與更新而同治之蓋不踰月而工畢李侯之有志於學而士方幸令之樂於教養也遂相率而興於學而以予得覩其盛也強使記之蓋予聞農夫之治田也時其耘耔而灌溉之是以有秋天下之治固有待於賢且能也庠序不立教道不備而以士不足取為患者是猶不耕而無所穫也方今主上一新學政而教養之法未及於縣縣學之所有者又皆輸之州則縣之學於興為難且令之勢輕矣夫以難興之事而遇勢輕之令非有知本信道之篤者持之而又文致牽其前俗論劫其後

吉安府志

卷十七

安福學校

二

則斯學也何時而可以復存哉安成於邑為事劇而李侯治之獨有餘裕其勇於有為則不知其勢之輕樂於行道則不顧其興之難故能急當時之所未急非知本信道之篤者固不能如是也夫牧民而導之以善者吏而學者養才成德之地也吏不知所以導之而徒使斯民自養而自學是豈朝廷立學之意而為令之所當然哉故予喜道李侯之所為而書以善其後

元祐五年庚午知縣譚侁移治東去縣里許

紹興十二年壬戌縣丞趙師日請於州改學治西丹霞觀知縣向子賁修邑人王庭珪記

記云紹興十年冬十有一月開封向侯子賁宰安福下

車思所以化民成俗之本大懼弗能究宣始謁先聖於學惟王宮四壁無旁屋以備登降宮之外故基甚宏大皆頽垣壞瓦異時師旅暴起有司以軍興責吏事視學校若迂遠而不切於治如是者十餘年侯乃進諸生告之曰郡邑不可無學是於國有繫也邑丞趙君洪聞而贊之諸生退而喜相與出私錢度外垣地增築其址推擇諸儒有行業者六人董而作之越明年學成廟像一新重門繞垣堂房庖廩若經籍祭器之藏若師儒之舍皆嚴麗壯雅冠於一時乃屬其邑人王庭珪記之庭珪因得考庠序之廢興以明侯之用心而為之說曰周衰黨序之教息夫子無大位乃立言以傳世書成而亂臣

吉安府志

卷十七

安福學校

三

賊子懼後世有國有家者由其道則治不由則亂魯不廢周禮君子以為未可動秦人燔詩書楚人亦燔其宮漢興公卿起屠販叔孫通與魯諸生作漢禮儀其事至苟簡猶足以奪拔劔擊柱之氣厥後春秋饗祀無所郡國者儒以素木匏葉行禮於私家縣宰反率吏屬而觀之何其陋也終漢之世雖通經而不本於學至其衰也王氏小兒談笑而竊其國東京建學之盛士三萬人以名節相高奸權崛起橫行天下猶悚然畏之何哉又嘗見唐公卿大臣失節於賊而六館之士獨不受汚然則士之漸摩由學校而出者其風如此世之為吏者或不足以知之而侯獨知以為急也治縣一年而刑清訟簡

民服其化將見禮義行而先王之俗成士皆光明秀傑
足以有為於世或登朝廷位將相為時偉人有如不試
尤當勵名節鼓舞振動有以自列於後世者未必不自
侯興學始紹興壬戌夏五月癸巳記

元至元十六年己卯為宋祥興二年縣丞張信之脩邑人
王炎午記 失載

元季燬於兵

明初知州姜明修大成殿邑人彭及記 失載

洪武二年己酉知州侯健建明倫堂劉霖記 失載

洪熙元年乙巳知縣趙敏脩廟學豫章胡儼記

記畧云安福教諭桂復訓導董熙遣其徒歐陽文翰劉

吉安府志

卷十七

安福學校

四

俊齋書豫章詣吾廬而請曰安福為邑雖僻遠而學校
生徒頗知務學但廟學歲久風雨圯壞天台趙敏來令
茲邑下車之初脩謁廟庭慨然獨以興廢為已任一時
力不逮乃節已俸倡之積歲而後有為於是鳩工庀材
脩其舊而益以新經營於洪熙乙巳春告成於宣德丙
午秋學廟廊廡堂筵齋講規模閎壯有加於昔休息之
舍庖湍之所各以其叙既而又得貳令南樟徐才以翼
其成故上下之間得於觀瞻者皆稱其能士子來學得
有依歸者皆讚其美願有以為記俾來者徵焉洪惟聖
朝稽古崇文自京師都邑皆有學學皆有政典章之布
經籍之頒教條之施與夫廩餼之豐而祖宗拳拳垂範

立極養育人材者亦欲化民善俗而已化民善俗者政之本也安福在吉之上游人多士夫學知務本土之居學校者相與切磋琢磨講明周孔之道以底夫道德之歸出為公卿為大夫為守令而文章事業有可稱述其父兄耆老率其子弟相觀成善禮義興行孝弟忠信之化洽於其鄉庶上不負朝廷建學立師教育之恩下不孤賢令良師造就之意雖余老處山林則亦喜聞而樂道之也故為之記

宣德間知府陳本深建鄉賢祠於文廟東垣邑人吳節記

記畧云祠以鄉賢名祀鄉之先正諸君子也天生賢哲

吉安府志

卷十七

安福學校

五

其數不偶而其所成亦不一概宋紹興間編修胡銓以言事被斥時秦檜擅權羅織鉤黨獨庭珪王先生毅然不顧以二詩投銓有奸諛膽落之句遂並坐斥譴凡二十餘年晚方被召入直秘閣陳謨阜陵受祠祿以終身其高風直道為士林首稱當德祐初融州守子薦劉先生提犛兵數千保靜江戮力抗敵書其笏曰吾頭可斷而膝不可屈卒於城陷不支盡瘁以死可謂守義殉國者矣迨寇賊蜂起洞獠肆行攻掠時行簡李先生尹信豐擁鄉兵守城父子俱戕於難邑人懷之以雙節祀焉其生平所著有春秋會通今行於世至若閒居不仕淹貫經籍留心理學則有公瑾劉先生詩傳通釋能發朱

氏之餘蘊魯叔彭先生推廣樂書足補蔡氏所未備而
瑞節黃先生得西坡之傳則又輯濂洛關閩諸儒之言
以為朱子成書此家傳人誦如日用器物不可以暫無
者也以先正諸君子之在當時卓然風節之高如此按
前志邑中舊有鄉賢祠歲久圯廢宣德中廣右憲副萬
資中始慨然於此未幾南歸謀於祭酒時勉李先生又
得郡守陳公本深捐貲為助遂經營創構於文廟之東
垣方十尋為室四楹廣三尋深稱之中設几筵置酒器
為位凡六遇春秋二仲祀先聖孔子禮畢邑令率學官
子弟與耆英諸老奠焉於是邑後學吳節說於衆曰吾
邑人物其將必復有大振者乎昔郡學既立鄉賢祠益
置麗牲之石

景泰間知縣賈懋修廟學

宏治間知縣莊典葺之

正德十六年辛巳知縣俞夔修大成殿兩廡大成門戟
門明倫堂日新時習二齋庫房饌堂神厨牲房儒林門
殿前泮池石橋教諭廳在明倫堂後鄒守益記

記云正德辛巳重修儒學成御史中丞孫公燧郡守徐

君冠節推王君暉邑令俞君夔縉紳士夫及山林之逸儼然造焉由興賢之衢西歷於泮宮北入於儒林瞻於戟門櫺星以拜大成廡下又北升於明倫堂東北入於師儒之舍東西觀於齋又東謁於鄉賢名宦南出於號舍煥然改觀以為元豐紹興所未備也司教事劉君勲楊君繪薛君騫相率徵言以紀成績某竊聞之父師曰學校者士之肆也師以孔子棲之正鵠也揭以明倫示穀率也孔子聖之大成南面王祀而春秋灌獻之從以四配列以七十子而續以漢唐宋之諸儒所以教學者之為聖人也以生知安行之聖而子臣弟友之道歆然以為未能是聖人之穀率可知矣由其穀率以求至乎

吉安府志

卷十七

安福學校

七

正鵠然後不愧於肆而為良工今之為士者果能不愧於學校乎對越聖賢陟降庭階誦其詩讀其書偃然以為孔氏之徒矣試於有司洋洋乎孝弟忠信之辭雖使游夏命辭予賜操筆幾無以逾之而其所以事父事君從兄而先施者顧疾背而遠去一旦升於民上則功利刑名簿書筐篋雜然以為民蠹而親親長長之化寂然以為迂緩而不切吁學校之設其責望於士者豈擬至是哉吾邑以多士名於東南來遊來歌者亦思孔氏之穀率以中乎大侯之鵠庶無負師帥崇勵之意云

嘉靖十三年甲午奉詔建敬一亭於廟左藏御製敬一碑及五箴碑

三十五年丙辰巡按御史高行縣重脩遷名宦鄉賢祠於廟右縣丞何一慶捐創戟門外石欄鄒守益記 失載

萬曆十一年癸未知縣閔世翔撤新故廟知縣吳應明相繼增飾邑人鄒德溥記 失載

二十八年庚子知縣夏九鼎修邑人劉孔當記

記畧云夏侯璞齋自新喻移令吾邑甫數月而邑理顧獨於學舍圯心欲新之而未言也會下里有奴產子乘其貲累千虐使其主至甚諸青衿之子與薦紳先生以為言侯既以重典繩之復念此豪者奴母亦惟是刀錐錢鏹之贏故至此顧沒之官則無名糜之他用則不經其以新學宮可因屬之學博饒君楊君鄧君會估其直

吉安府志

卷十七

安福學校

八

自文廟兩廡而下以及各祠自明倫堂而下以及諸博士之廨自泮池而外以及負郭出入往來之途計費若干令悉貲營之踰數月而學宮壯麗視昔有加吾邑上下之分視他郡國頗異他郡國名宦工子取羈置而已有故則颺去而吾邑人奴始故用厚值鬻之已復取婦婦之婦生子又為卵翼哺衽之長子孫仰衣食主名為主僕有親父子之澤故俗謂之義男或者不察而一以他郡國例概寬之諸奴曹接踵特起邑遂以為希有罕覩之變爭相驚以告而侯令新喻已前知其俗至即痛摧之學舍之新也余適以使事過里門楊君饒君鄧君以記屬余余綜其始末而嘆曰侯其猶行古之道也夫

嘗觀詩至魯頌之篇曰在泮獻囚泮故先王所使學官
之子弟講業習禮其中雍雍乎以揖讓文事相後先者
也囚於何用而獻之及讀虞書而後有味乎斯言也虞
書之言曰庶頑讒說若不在時候以明之撻以記之有
人焉而既頑以讒吾惟恐屏之之不亟也安所事
於侯以明之聖人曰吾將致其州閭族黨之衆張侯而
抗射於斯公議其罰而徐致其辟衆目之所視衆手之
所指其愧心於所與競者當不待痛而服而其羣聚比
耦之衆歸而父告其子兄語其弟亦莫不曰夫某以某
事得某譴吾所耳而目者也一有非是輒動色相戒均
有戢心泮之獻囚意亦本此奴之陵其主其猶陰之乘

吉安府志

卷十七

安福學校

九

陽而冠之苴於履也在虞已浮於庶頑之科在魯不減
於匪茹之夷今將暴其逆節以正告於庶衆而為之蔽
所恃以有事於壁水橋門之區於以懲奸陵於此而厲
風教於彼即藏罟揚鱗莫斯為大故曰侯其猶行古之
道也夫泮之役史克實作頌余史也即未能頌何可無
紀侯名九鼎璞齋其別號也浙之嘉善人萬曆壬辰進
士

四十三年乙卯知縣陳保泰天啟六年丙寅知縣高賚
明崇禎六年癸酉知縣陳昺虞十二年己卯知縣葉子
發先後增修明末燬於兵大成殿僅存

國朝順治十三年丙申知縣袁時泰復建明倫堂

康熙五年丙午知縣焦榮復捐建明倫堂移舊堂於後
為啟聖祠於左創儒學舍修大成殿建東西廡名宦鄉
賢祠王辰施閏章記

王記詳
縣志

施記云天下之盛衰人才之得失視學興廢兵革未息
則不暇治學及其既平吏困於簿書士窮於衣食淹月
累歲卒以無成故非強幹有為者不為功安福之學不
治久矣新野進士焦君榮治縣之三年振竄扶萎賊充
而暴戢乃出力新夫子廟置學舍又以私錢買田租六
百斛贍士之來學者不數月而就邑人來告請記之此
蓋安福之盛時所不數見者也今邑中比歲水旱逋負
相接漕艘之營作屯卒之勾補兵艦之驛騷粵餉之督

吉安府志

卷十七

安福學校

十

催山民之獷悍事煩節促不遑宵晝於此而從事學宮
進諸生敦古儀吾見其才行之去人遠也雖然古者有
學無廟羣師弟子日習其中而因祭菜以明敬也後世
有廟無學置博士之長僅司俎豆而弟子不與居也然
則學雖具而闡無人焉以滋茂草猶無學也名隸而實
背途一而趨岐雖委粟於地以飽窶士猶無學也夫學
者求諸聖人之道而以之育才則才出以之蒞事則事
治者也漢人多尚經學既受一經則服官斷獄之事無
一不出於經今人首尚制舉業而以其餘力治經父師
之所傳子弟之所習詩易春秋之指甚且稍昧於聖人
非惟無學又無經也學聖人之言而至於無經不其甚

歟安福於吉為中縣土淳而材茂舊多君子明正嘉間以理學稱者鄒公守益最著次則劉公陽及文敏邦采諸公皆反身切理深入而自得故一時從之者甚衆其後學者之患或離經傳侈空談於是劉公陽嘗極論之以為世儒道堯舜之孝弟而鄉黨無稱小温公之誠實而然諾不踐深言幽獨而無忌於可指可視高言著察乃未及平行之習之吾讀其言未嘗不撫卷歎息深吾道之憂也居今之世志聖人之道雖鑿岩而處負經而鋤居子子行踽踽苟其氣專而力深吾知其必有獲也况土淳材茂聚族於學而弦誦飲食其中者乎工有肆農有畔士有學各其所也亦各其業也由其塗者衆而

吉安府志

卷十七

安福學校

十一

收效者寡則吾所不敢言也

乾隆二十八年癸未知縣尹廷賓倡修三十九年甲午知縣李慧教諭張禹遜訓導王步蟾復勸輸竣工改建櫺星門添造內泮池增築露臺改明倫堂於聖殿左教諭署於明倫堂後訓導署於崇聖祠後知府盧崧記

盧記云安福廟學可攷者伍誥記宋元豐四年辛酉興學其基在治東南元祐五年庚午移治正東紹興十二年壬戌復徙治西則邑人王庭珪有記自元至元十六年己卯至明嘉靖三十五年丙辰凡十修治而邑人鄒守益兩記其成自萬曆十一年癸未越國朝康熙五年丙午又八修治守道施閏章記焉距今蓋百有十年

矣中間隨時修治不一役近自乾隆二十八年癸未前知縣尹廷賓詳請節文武俊秀試費佐以邑紳士樂輸大修治之然首其事者不盡得人十年功猶弗就歲癸巳余典郡事時則直隸李君慧為安福令司鐸之官則張君禹遜王君步蟾皆切切欲竣斯舉未幾余親按邑邑紳賀世駿歐進諸生朱德言胡京山歐陽稔以新建磚坊非制公籲改造二司鐸請曰諸紳士方別醵金為工費幸公成其美余謁廟禮成集諸生講學復周視工程各如式獨前所云磚坊者果臃腫不中繩墨急諭撤去於是羣懽欣鼓舞召匠伐石就其址建櫺星門增立露臺前首事等既新大成殿開內泮池圍橋三又浚外

吉安府志

卷十七

安福學校

十二

泮整圍橋五遷明倫堂於殿左續建教諭署於明倫堂後訓導署於崇聖祠後始癸未訖甲午八月積十年之力而後成事益交相慶以成美之功歸之余而環請為記余惟李令之治邑也與民不擾偕兩司鐸率邑人士完垂成之工誠有所不得已至於閉者開塞者通循定制而加宏敞惟斷乃成余特為諸紳士斷之而已雖然學立孔子廟士之學皆孔子也而行不必皆孔子安福之士之學其亦從鄉先進之學孔子者可矣郡志稱吉州自明正嘉以來譚學者至衆而士所共宗必曰八先生獨安福居其四四先生之學皆從王入而各相為救因各底於有成獨東廓兢兢於戒懼慎獨粹然一出於

正八先生之學主王學者七泰和羅整菴獨憂之致書與王辨又往復與歐陽南野相商確晚著困知記期於由下學而上達也諸生於四先生中當主東廓於八先生中尤當主整菴本下學立心之始以入德即學孔子從入之階梯在是矣况邑舊有復古書院其鄉先達又立四書院於鄉以提唱學徒盡各修復而肄習焉標其極醇無弊者以為依歸將見上之足以應

聖天子之旁求次亦爭自濯磨於一鄉一邑作比閭族黨矜式夫然後其學即其所行庶幾無覲然於廟學之中云謹記此為諸生勗

名宦祠在文廟左祀唐楊彥伯以後二十一人

吉安府志

卷十七

安福學校

十三

鄉賢祠在文廟右祀宋王庭珪以後三十五人

忠義祠在文廟右

節孝祠在文廟左

按學基東至興賢坊西至城牆脚北至右牆官地南至外池直深三十丈有奇橫二十七丈周圍三百六十餘丈廟門下鄉舉歲貢題名記碑三座修學記碑三座復射圃記碑一座堂內卧碑一座修學記碑一座學田記碑一座號舍五十間宏治十年莊典建以仁義禮智觀德觀熙動心忍性為號久廢 又按學宮外有池二一在明倫堂後名北池周回六十餘丈宣德間副使石璞清復一在儒學東名東池周回二

十餘丈景泰間都御史韓雍清復射圃舊在學宮西
萬節記久廢崇禎間知縣葉子發復建旋圯今遺址
尚存

祭器樂器乾隆三十八年修整與府學同
學額

原額入學文生員二十名武生十五名廩膳增廣各二十
缺乾隆九年分文生員額五名武生額三名廩膳增廣
各三缺歸蓮花廳學

學田

明嘉靖間知縣俞則全始置田坐落十五都銅鑼鄉佃戶
宅舍三間租八十七桶糧俱開免王學夔記

吉安府志

卷十七

安福學校

十四

記云邑學博學石某偕同寅江君林君來授予以牒曰
茲俞侯之教也侯念公廩之有制也子弟之繁且賢也
為田以助給之廩王政之勸也田牧政之平也子曰善
哉君子之識其大也志其永也示其周也申其忠也猶
勸之道也古者塾序庠學咸有公食田則歲入有常而
興乎士類無窮已矣顯比之公也抑所謂顧其安由其
誠而盡其才者乎國家建學育才之意益以張大與創
物收名者殊故曰猶勸之道也惟侯端而嚴愛而有禮
身教之功不假於田惟士也亦將待田而興者乎則侯
之教荒矣是故其道必本於人倫明乎物理其要在於
擇善修身以至於化成固大學之道也其始從入莫先

於篤信好學由誠以自盡其材猶之田也固惟五穀之
正味求之而布植之力既耜而播播矣而穠量時俟獲
乃登崇要在乎熟而已惟今日學校之設純用經術固
正矣開明誘導以興起焉者非師之責乎葉君作而言
曰嘗聞之矣君子以多識前言往行以畜其德博學而
詳說之將以反說約也學之的也夫謂六經為註脚其
或誤乎侯留情於學崇經術也惟士不迷於所趨實見
而篤行之為有以報也江子曰實勝善也炫虛以誣名
自欺也善侯之養以實也林子曰斯道也有正大而非
渺漠有光明而非空虛有易簡而非捷徑精思力踐恐
未之能誠恐學者之誤厭支離而樂省便無以勸也予

吉安府志

卷十七

安福學校

十五

曰久未能茲訓窮理盡性之學於是焉徵有不竦然動
聽者乎學之興也賢之聚也田若干畝租若干石里址
佃名具載碑陰將以俟後君子之續焉

萬厯間知縣倪凍益田八百畝餼士外以時賑散寒士
邑人鄒善記

記畧云三代之治尚矣漢去古未遠循良之政彬彬然
猶有存者有起學舍選明敏吏自飭厲之復遣詣京師
受業博士者有禁婚喪勿循奢靡吏子弟好遊敖不務
田作輒罷斥之者有為條教置父老師帥伍長勸以為
善防奸之意者有造立校官令掾家子悉詣受業免其
徭役者有崇儒雅重庠序為設四誠以定六親長幼之

禮者夫自文翁以來大者廣陂湖度頃畝重牛犢教犁
耕凶旱有賑鰥孤知恤小者種桑柘植苧蔴藏果實蓄
菱芡榆韭有數畝雞亦所不遺非不蔚然可紀居悅而
去思也而史獨詳於學校教化者良以庶富而教王道
以之而成也雨田倪侯之宰吾邑其用是道歟侯始蒞
任勵精治道明允獄情正已率物其覲而歸也誠感雨
澤教洽師徒覈虛糧之歸嚴無賴之禁城樓圯為重新
之浮橋毀為更造之兩書院規未備為振起而資藉之
今復以贖錘置田若干畝歲入租若干斛付諸學宮以
資諸生會課及貧乏無助者學博陸君應龍蔡君博韓
君陸倫詣予曰倪侯之績偉矣其厚我黌舍至矣願一

吉安府志

卷十七

安福學校

十六

言以紀成績善嘆曰茲古人居官如家之義也記曰聖
人能以天下為一家者非意之也理有固然吾惟循之
而已倪侯以家視吾邑吾邑之子弟浸漬教澤其思所
以仁耕義耨日穠茲以圖有秋政成而召命至將以家
吾邑者家天下蒼生矣漢循良云乎哉侯名凍字霖仲
浙江上虞人成萬歷甲戌進士

按原額學田計租五百九十七石二斗五升除荒蕪
外實租二百九十五石歷係縣吏徵解康熙四年六
月內由縣移學署訓導劉一元申詳徵收不及情由
於督學道王批據該學詳稱縣冊開載學田陸續水
決荒蕪兼以畊戶拖欠不能賠補每年徵銀二十七

兩零解道永為定例康熙六年知縣焦榮捐俸一百五十兩置石鼓青溪田租四百二十桶佃屋十間其田捐贖學中貧士不在學租解額之例

龍泉縣學校

龍泉縣學宋明道二年癸酉知縣何嗣昌建於城中慶歷初為夫子廟熙寧四年辛亥改建城南門外紹興二年壬子殘於盜八年戊午攝縣事李準建屋數椽十六年丙寅知縣蘓欽繼作殿堂齋舍咸具南野田邦鎮記記畧云惟皇慶歷四年詔州縣立學建夫子廟熙寧間頒舍法於天下作新人才而邑始度地創學在城南門外東偏靖康之際戎馬臨郊齋舍蕩為灰燼今幸武偃

吉安府志

卷十七

龍泉學校

十七

文修改教播於遐方盱江李準來倅龍泉縣事慨然興復依舊址結屋數椽未竟厥事溫陵蘇侯欽以曹檄領邑宰復申前議建學而邑紳士王大猷劉夢兆輩又率秀民以為之倡鳩工市材費出在公而不擾於民若文廟門廡講堂齋饌以及生舍廚庫咸鼎新之自有廟學以來於斯為盛蓋邑之士夫暨諸受業之子弟咸感侯之修樂於釋菜之有其地矣邦鎮南野與泉介隣侯同年友也屬記其事余考泉之學原在縣城內今遷在南郊當山川之勝故清淑之氣鍾而為人率多穎悟出羣之資使澤之於庠序之中其底於成人有德也何有哉願泉之君子共勉之以無忘蘇侯之德

紹興二十九年已卯知縣胡敦詩修豫章胡敦實記
記畧云龍泉吉州上流巖邑廟學肇建於本朝慶厯間
先是典守者屢嘗修治但事涉簡畧日入於壞豫章胡
敦詩來宰邑之初年見學將荒頽乃會其祿入并勸勇
於尚義者葺材度工修敝易新不數月而告成既設奠
於廟遂立之師進諸生而教之凡民有來觀者皆勸之
以學而民之強暴子弟一有弗若則父兄長老切責詬
怒惟恐見絕於司牧休休焉方日以興學為事泉之民
卒無一人攜離轉徙者長吏豈獨賢民得其所生者也
考泉地山明水清壤沃而產厚民多殷富自立縣以後
猶有古樸之遺風迄乎皇室南遷國家晏安太平之典

吉安府志

卷十七

龍泉學校

十六

日興而泉獨能首先倡學儲英育才惟周孔之教是明
惟堯舜之道是適此則守令承流布化治得其要亦王
者禮樂百年而後興之說也若夫捐輸之多寡工役之
成就宣力效勞之姓名邑令吾弟也自能詳載於碑陰
淳熙三年丙申十年癸卯兩圯於水十五年戊申簿黃
竿攝縣事修復舊觀慶元三年丁巳知縣景時重修孫
逢吉記

記畧云龍泉古屬邑也代有聞人學日就圯士以狀白
邑宰邑宰憮然曰學宮蕪勿治是惟有司罪即首修孔
廟次廡次堂次齋舍次養士之舍一一完整費出有經
俱辦自公落成之日邑宰景侯名時邀予同率博士弟

于入學行釋菜禮鳴鼓升堂與諸生論說其博士弟子
與其故老皆喜謂侯得所先務欲問言於予予曰士顧
以多舉為學宮重哉士多舉為其仁義禮樂代天子施
之四方則坐而言者皆可起而行仁義禮樂隨時而用
之者也遠而達之天下近而不出戶庭故草野有正學
而後天子之庭有真儒泉俗素樸其子弟亦皆兢兢以
廉恥自持而純龐博厚之習未雕即今雖未施仁義禮
樂於四方亦必有修之家者今以科目稱盛者曰某郡
舉士幾曰某邑舉士幾跡士所自為未聞以仁義禮樂
號於四方由此言之固不如泉士猶養其純龐博厚之
氣以自全故科目不在多舉士而在舉得其士雖然氣

吉安府志

卷十七

龍泉學校

十九

積久而昌泉必有偉士出卓然見重乎郡邑城郭社稷
幸勿悅於紛華貴盛以散其純龐博厚之氣云

嘉定四年辛未縣令郭應祥重創堂齋開慶元年己未
攝縣陳昇重建大成殿景炎二年丁丑燬於兵

元至元十四年丁丑為宋景炎二年遷廟學城西隅二十
三年丙戌巡按趙顥復今所邑人項振宗完修至大二
年己酉振宗復重修之至正十四年甲午燬於兵

明洪武元年戊申知縣高德賢重建主簿張時敏記

記畧云惟元祀戊申上陟帝位詔中外郡邑興學校修
典禮百司欽承庶績咸熙厥初乙巳春予被命來佐是
邑時則汝寧高令起巖聿先視事越三日同謁孔子廟

禮既高令進者老趙文蕭望李齡暨儒蕭暉劉韶蔡鑰
若而人告曰泉文獻邑而學庠圯於兵燹祠宇湮廢殆
弗稱曰予士子久懷於茲嘗謀為力弗逮令曰於念哉
予曰學校居六事首令此當先予其可後然廢墜在昔
興舉在茲勉而行之未為艱令曰旨哉翌日乃議於公
庭縣丞胡原幕賓許百達成在曰建學之設疇能先僉
曰項氏名善可次雲彰彥進可又次王義伯均茂可曰
疇能董厥工曰蕭望可令曰余忍之咸造不待勸而說
從乃捐厥貲鳩厥工各就緒望總董之以丙午二月朏
經始十二月望告成禮殿門廡煥乎其新昔廟學基邑
南兵後以城限乎外厥土高厚環山帶川因舊址而作

吉安府志

卷十七

龍泉學校

二十

越一日蕭望踵庭告曰邑庠既功可弗記哉予乃言曰
聖人之教行於世猶日月之在天愈遠愈明欽哉孔子
以生知之聖繼羣聖不傳之緒集厥大成其功過於堯
舜遠哉宜夫教貽百世道垂無窮亘古亘今而不可泯
哉惟我國朝光宅中夏文教誕敷渙頒明詔興崇學校
將以復振隆古而高令居牧式克欽承謂學校曠廢大
本未立乃謀及寮案勗諸好義惟日孜孜不遑寢食甫
期年而圖功攸終我其尚哉自時俎豆有以設威儀有
以陳禮樂有以講將見教化丕宣彝倫攸叙其為世教
豈小補之哉

建文元年已知知縣吳瓌重作大成殿宣德五年庚戌

同知王仕昇知縣蔡恩訓導劉屋修邑人譚原性記
記畧云龍泉儒學舊址後界方城前抱大江橋南山拱
五華凝嵐聳翠形如筆架江渚洲橫魚袋澄清漾碧儼
若書臺邇者曰廟曰廡曰堂曰齋歲月積久風雨震陵
材腐而蠹中瓦墮而垣毀宣德己酉冬邑有儒士劉君
倣載領薦超試內庭獲中程度授職歸為邑庠弟子矜
式憫學制漸隳奮然有志重修白之府照山東博興計
君默邑貳姑蘇虞君鯤邑簿崇明黃君永發命耆老數
人持疏謁諸富而好禮之家莫不翕然而集不踰月間
明倫堂成堂後別有退室窻戶軒廠粉飾維新晨昏擊
鼓升堂諸生濟濟會講堂下金聲玉振邑人奔走而觀

吉安府志

卷十七

龍泉學校

三

聽者老稚以百計予時官吏部拜宸恩歸獲覩盛事將
赴闕下倣載惓惓求記予因遺之曰廟廡未葺兩齋未
修生徒黌宮亦不得其安適子尚勉之今年春倣載致
書幣走京國報曰近得郡大夫同府上虞王君仕昇別
駕舞陽邢君璘邑宰東陽蔡君恩邑貳柳州吳君應琦
判簿中山謝君貴邑幕平陽曾君仕圭協心共成偉觀
視前制度迥不侔矣若其物費不資於官而規畫有方
不斂於民而取給不竭願以鄉邑為念援筆為記斯文
幸甚惟聖人之教克滿天下雖一邑之小亦必得其人
則其教因以興行不得其人則其教由以隳弛倣載司
訓邑庠而能篤志修學人材賴以作興予奚可不思記

一言乎遂志之

景泰元年庚午僉都御史韓雍飭教諭方玘勸邑人謝汝泉項所循方宏佩等捐貲大新之歷四年工竣方玘記

記云古之有道有德者生則教於其鄉死則為樂祖祭於瞽宗瞽宗殷學也學有鄉賢之祠非禮也禮出人心之本然居其鄉習其文章德業感發寤寐或如見之不有崇報之禮耶故建祠於大成門西歲春秋之仲月丁日進釋奠夫子之宮退率諸生拜祭祠下仰止高山崇報之在人心自不容已者祀肇景泰七年八月六日在祠者九賢宋三司判官蔣公賁轉運副使蕭公世京翰

吉安府志

卷十七

龍泉學校

三

林學士郭公知張敷文閣待制郭公孝友承信郎李公靚解元王公洋集英修撰獻簡孫公逢吉省元羅公克開知龍泉縣孫公桌云

五年甲戌儒學門圯邑人彭祖謙修復之

國朝順治十二年乙未知縣路汝前修復正殿十六年己亥知縣石曜率邑人李魁春修大成門康熙四年乙巳知縣郝爾瞻修明倫堂及兩廡邑人李士琮獨修櫺星門十三年甲寅寇燬邑人彭祖謙捐葺二十年辛酉教諭盧夔龍再修自為記

記畧云龍泉學宮自宋始歷年既久學宮遞興遞廢至甲寅鼎沸芹宮茂草之傷匪朝伊夕矣康熙丁巳夔龍

司鐸於泉雖捐金竭蹶以從而猶未敷也為勸闔邑紳
者捐助共勦厥事工竣凡殿廡齋舍規模聿備繼此而
名儒經濟文章節義振古如斯於今為烈端可待也敢
攄俚言以為記

三十二年癸酉知縣趙嗣抃修明倫堂邑人項弼先記
記畧云泉邑廟學鼎革之初皆鞠為茂草順治十二年
始復建廟然簡畧樸陋僅足以容俎豆蔽風雨我趙侯
蒞任之二年鳩材庀工建明倫之堂諸生之講肄有所
既而製邊豆飭禮器惟廟制之規模弗稱歲在攝提乃
撤而新之面蓮峯循舊址向明之義也費取於公餘益
以私祿雖私倍公不勞籍也徒傭給以值不煩里甲也

吉安府志

卷十七

龍泉學校

三

孟夏經始七旬而工成豈惟士類得所仰瞻即農工商
賈咸知聖人之道常尊於萬世其係於世教何如哉自
仁義之道不明而異端邪說得以其怪誕不經之言肆
然欲駕出於天命民彝之上陽儒陰釋者又從而羽翼
之而子臣弟友之道數而弗彰我侯斯舉俾將來之為
學為治者咸知愛親忠君為教而不惑於自私自利之
異端其有裨於聖教者可為後世取法焉

乾隆二年丁巳知縣三保移建學宮於城內縣署東邑
人歐陽嶠捐千金首倡合邑士民共輸金鼎新之主試
江西學士彭啓豐學政趙大鯨泰和梁機俱有記

趙梁
二記

詳縣
志

彭記云吉之龍泉有宋時學宮固在城也熙寧間舍法興行改建南郭外其毀於兵潰於水者屢矣元至元十四年始得遷城內西隅二十三年復遷城外嘉靖間孝廉胡作霖謀於今梁大成以移建上請而卒不果今孝廉三君保來尹是邦化行俗美邑人士協謀移建力陳大吏報可余適來典辛酉省闈試事揭曉後門人梁玉恂恂晉謁徐奉遷建學宮原委視余丐一言記之且乞宣示先王所以建學設教之本旨為邑人士勗余惟歷代尊崇聖學本朝典數之隆曠古未有凡欲吏斯土者興賢愛士有以長養而成就之其為士者生逢文教誕敷之日皆當仰體所為建學設教者培實學毋獵聲

吉安府志

卷十七

龍泉學校

三

譽敦實行毋狗浮華處為鉅儒出為名宦初非如形家言將以此掇巍科躋膺仕以誇耀其鄉鄙已也學記云凡學官先事士先志邑有賢尹而事克舉有磊磊明明秀杰軼羣之能毅然釀乃金襄乃力務規其成俾數百年曠舉嘉與維新於以傳之永永弗替乃為克竟厥志梁子云考之往牒有元時學之舊址曾改為龍吟觀嗟嗟古人所云廬其宮者反易而廬儒者之宮廢興有時修復有數母亦至聖之靈有以默為佑啟將以光大茲學乎夫前事之不忘後事之師也千百科名不敵一賢達者之風節稜稜也昔者朱文公在經筵持論切直為忌者所中右正言孫逢吉侯上怒少霖謂熹所言皆正

願留之以重經幄以忤韓侂胄丐祠卒諡獻簡弟逢年逢辰皆有文行孫氏三賢之名至今猶芬齒頰也裴行儉云先器識而後文藝龍泉孫氏有焉且即以文藝論寧正毋僻寧潔毋溷寧枕經藉史直造古人堂與毋令後生小子徒逐逐然日汨於時俗帖括馴至於不可救藥此士子精明果銳之氣所由生亦衡文茲土者之所藉手以上報

聖天子者也是役也擇基卜吉初未有成議久之於縣治東偏得故大冢宰郭公維經宅基衆以舊學址易之計其基延袤三十五丈廣半之其爽塏陽明泉山遂水之間增靈異焉其面勢審規由殿而廡而櫺星門殿後翼

吉安府志

卷十七

龍泉學校

二十五

以啟聖祠明倫堂凡鄉賢名宦署齋庖涵井欄無不次第竣功所尤異者坎地為泮有泉灑灑雖旱弗耗學海心源文淵如鏡地靈所濬或亦是邦祥和之氣有以感之使然興功始於乾隆二年五月落成於三年七月費凡七千緡有奇其慨然捐千緡以倡者為需次州佐歐陽嶠其共梁子襄事者為需次縣佐郭超高萬昇需次州佐張隨仁至更迭值日省防工役則縣尉傅榮昌孝廉胡振明經劉作义生員高萬鼎等六十餘人之竭蹶從事亦不可泯也功在學校例得并書

按吉州人文紀畧載有宋博士須溪劉辰翁所作龍泉縣新學記文無紀元但云五星聚南斗之明年乙

酉龍泉改夫子廟星聚南斗當時或有此占今已無可考證以宋三百二十餘年計之凡五閱乙酉當辰翁之時乃理宗寶慶元年之乙酉也茲志泉邑建學原委自寧宗嘉定四年縣令郭應祥重修堂齋以後至寶慶元年相距僅十有七載未聞復有修學之事如須溪文內所云朱簿謁殿園視見門扉齋廬無一有試思此十七年間何遽傾頽若是之速耶又云請孫氏設官宅為夫子廟又云相攸得孫氏故居金山之麓又云奉城外遷城中等語攷泉邑學舍初建城中至熙寧四年改建城南門外歷經修葺逮元至元十四年始復遷城中西隅是南宋歷朝學宮俱在城

外未聞有寶慶時移建城中之說至城西雖相傳有孫氏故居而金山又在城北門外非城中也然則須溪之文與泉邑建學始末迥不相符且核之寶慶以後如明主簿張時敏邑翰林譚原性等修學記所叙廟學基址修復歲月俱無一語與須溪文合者今將錄其文而不能實其事則事與文異即聞與見岐後之展卷者將於何徵信耶須溪文甚奇崛姑置不錄

附記於此以質後賢

新志原跋

祭器樂器乾隆三十八年修整均與府學同

名宦祠祀何嗣昌以後十一人

鄉賢祠祀蔣賁以後二十一人

忠義孝弟祠祀李靚以後二十五人

節孝祠祀梁固妻李氏以後一百有四人內百歲者二人

學額

歲試入文生八人武生八人科試入文生八人歲科俱撥入府學一二人無定額廩膳生二十人增廣生二十人每三載一歲試出貢生二人

學田

龍泉學田宋嘉定時知縣郭應祥置以佐廩膳開慶時知縣陳昇增置漸廣至六百石有奇知縣劉必端捐俸代輸併詳免租稅後為天寶桑林兩寺僧侵占及半元延祐教諭胡可詩與達魯花赤伯顏主簿胡淀及邑人項

吉安府志

卷十七

龍泉學校

二十七

雲叔等按籍清復見劉將孫復田記

記畧云龍泉學舊有田六百石有奇今僅半入上下因循不省延祐乙卯教諭胡君可詩按籍而索之天寶占五百石桑林占百二十六石往僧歲輸自稱僧田官不問而聽之胡君遣儒生臨田循覈僧豪抗則白縣下之里里胡進可集驗如學籍疆且歸以吏賄緩閱三月邑長伯顏承事來閱實慨然以為任戒行吏署成案唯謹三年簿新安胡君淀來暨典史龔君正協贊其長學舉事項雲叔以今字乃其弟司丞公重建也又偕子姪慇懃其間然後已再上之府府再報歸之學非胡君彊力必為非伯顏侯不利疚不物遷非胡簿君能相其終幾

何不奪於異議而移於重貲也故著僧之所以本無田者以祛世惑歷叙田之所以失者以示戒今之復之之難也以勸功云教諭字詩度澹菴忠簡公五世孫乾隆十五年奉文查報現在學田實止四畝一分有奇每年徵租銀四兩八錢三分零徑解學政衙門給賑廩生貧士

射圃舊在北門後遷舊學後圳邊

今廢

萬安縣學校

萬安縣學宋熙寧間知縣許浹建凡三遷慶元五年己未知縣趙師道改建縣治東北廬陵周必大記

記云學所以明人倫人倫不可一日廢學校其可一日

吉安府志

卷十七

萬安學校

三

廢乎雖然此王政也故凡君國子民教學為先治世則制度在上虞夏商周皆立大小學於都畿諸侯之國亦必天子命之教然後為學者是也世亂則學校不修禮失則或求之野故仕王朝者多有不悅學之說以及其大而列國如鄭青衿不至反朝夕游於鄉之校者是也或疑論語一書如帝王歷數之授受邦國政事之得失大而道德性命之要小而寢食衣服之節罔不及之獨學校畧不問答抑嘗深求其故司馬遷曰孔子以詩書禮樂教弟子蓋三千焉身通六藝者七十有二人如顏濁鄒之徒願受業者甚衆故當是時或問為邦或問為政以至祭祀朝覲征伐盟會治民折獄之類講習之已

熟切磋之已至徃徃隨其才器各底於成舉而措諸事業斯無難者是則傳道育材不在乎辟雍泮水而在乎杏壇之上洙泗之間也久矣又何問焉宋興藝祖方四征不庭已數幸國學欽崇將聖親為之贊列聖繼志首善始京師繇內及外至於慶厯學校遂徧天下蓋祀先聖先師於學古也後世郡國廟事而已復古之制且及於邑則起於本朝若守與令敢不敬承吉之萬安自熙寧五年為縣令將百三十載而學凡三徙士以為然慶元戊子夏四月知縣事宣教郎玉牒趙師道實來政知先後首闢龍溪書院遂議新學相方視址捐直與民得地二十餘畝以明年三月壬子僦工盡十月而殿宇學

舍皆成經史之閣左右生之齋內之庫帑庖湏外之門闔垣牆邃深爽塏幾亞都學費緡錢以萬計皆土人所樂輸而官以餘財助之且為經畫悠久贍給之計纖悉無遺徃來者但視其成而不知所以成也諸生請記其事予惟夫子教人非可一言而盡其論行藏亦豈一端而止然學成乃許以仕故說漆雕開之對而惡夫賊費宰之佞豈嘗使人以政為學也哉粵自王道衰而異端作霸者之後有楊墨楊墨之後有縱橫有韓申有黃老有諸儒之專門至漢唐以來又設科目以取士士方拘率時文或不得一意於學今國家開設學校惟周孔之教是明惟堯舜文武之道是適為士者雖藉舉業為入

古豐王君居敬來知縣事偕縣丞林君公異主簿王君信顧瞻太息懼弗稱朝廷作新之意乃與典史宣城陳廷輝謀撤而新之程材度庸諏日鳩工先作櫺星之門門凡三座繼作進德育才二齋齋各三舍又作兩榮以輔戟門者六間乃斥明倫堂而廣之其間為五其廣五丈有二尺其袤半其數而贏尺之二左右廊廡為間二十有四塗墍完密丹雘華輝垣屏四周營治悉備惟禮殿工浩費鉅未克就緒而縣丞濟南劉君延來乃相與勸邑之士而衆舉焉堅良效材而取諸羨強力趨事而庸諸隙用不加侈人不知勞輪奐之美克尊象設用是講學有所行禮稱其儀齋廬庖湑咸具無缺高壯宏

吉安府志

卷十七

萬安學校

三

麗之象視昔有加矣役始於是年冬十二月訖工於丙辰夏五月既落成教諭劉子完狀其事實來謁記將勒於石以示永久竊惟古者國都黨術莫不有學宮庭堂宇禮殿器數莫不有制所以隆政教嚴禮奠以為崇化尊賢之地五雲山川之秀鴻儒碩士代不乏人是皆斯文之運與天地同流未嘗一日而泯者長民之官其可不知化民成俗之所本乎有能修舉廢墜以興起斯文為已任實職分之所宜為而士君子之喜談而樂道者也故魯修泮宮奚斯作頌文翁化蜀史冊有輝王君仰體國家右文之意究心學校若此他日教化流行俾譽髦之士足於時用民俗之美不讓古人則無負於職任

之重矣余方忝教成均職在敦勸因其請故樂為書以示來者是役也董之者邑士鍾國器相之者邑吏張友文也

永樂間教諭黃須建樂育堂修明倫堂左右從屋并齋舍庖湏之所訓導劉池蘊修廊舍

正統十三年戊辰吉安同知趙銓通判蔡保倡修大成殿邑人朱與言記

記畧云萬安為縣上通交廣下接京畿旁達乎閩浙之區近抵乎荆楚之境蓋水陸之衝要四方之走集也縣東有學禮殿在焉創自國朝洪武計今七十餘年梁宇傾圯維時本府同知華亭趙銓通判永嘉蔡保暨予小

吉安府志

卷十七

萬安學校

三

子顧瞻徘徊不遑寧處乃諭於衆曰孔聖之道萬古不磨際天極地祇奉無間今其廟貌寢凌若是何以對越而瞻仰乎盍圖修葺以表尊崇輿論攸同衆心惟一爰相率諸賢豪捐金購材鳩工陶瓦經之營之不疾而速寢殿既完規模翼翼至於廊廡齋舍各治就緒經始於正統戊辰季秋朔旦畢工於景泰庚午臘月既望事竣僉謂余為記以傳諸後於是乎書

景泰三年壬申巡撫江西韓雍勸修學廟義民魯時望力任興建大成殿王直記

記云萬安文獻之邑也儒學在縣治東北而當山川之勝若金鷺芙蓉諸山章貢諸水重岡疊嶂靜波駭浪不

間遠近故昔之作者有取焉其建立廟在前學次之人
既鍾其淑清之氣而益以學問往往登科甲躋膺仕有
盛名當時而萬安之學著稱於天下至於今久矣繕治
不繼日入於敝朝廷每下興學之詔有司以多務鮮克
用其力景泰壬申都察院右僉都御史姑蘓韓公永熙
奉命巡撫江西得便宜行事政令修舉威行惠施而首
以興學為急至萬安謁先聖周覽殿庭而嘆其敝陋召
邑中之耆儒秀士豪家巨室欲集衆力而新之邑之義
民魯時望言於衆曰公之興學以聖人之道教敝邑弟
子甚盛心也為父兄者奚可不自勉而以煩公慮乎學
之資用殿為大時望請獨任之一不以及人公大喜加

吉安府志

卷十七

萬安學校

三

獎勵望務遠圖不惜細費市杉木湖湘間必取合抱大
材其地磚瓦鐵石黝堊丹漆等物及諸工匠皆求其良
者而以財致之計白金千餘兩是年十月興工而以明
年九月成為大成殿三間高四丈五尺有奇而深廣稱
之修梁巨棟重簷刻楠土木采章極其輪奐聖賢像貌
之居殿中者皆塑繪如制視昔之美有加焉既而韓公
復以事臨萬安徘徊瞻視其巍然煥然可以冠諸邑益
大喜曰時望嘗出穀賑饑璽書褒賞為義今又獨構巨
費以成興學之美豈非好義之士哉爰為記以刻諸石

按王直學宮記景泰三年壬申義民魯時望建大成
殿三間逾年癸酉告成又逾年甲戌方圯復有學宮

記增建屋百八十楹是建大成殿為魯一人獨任竣工於癸酉其餘衆功所成竣工於甲戌也萬安舊志興建本末未詳今增立一綱編方玘記於後

景泰五年甲戌邑人士增建學宮方玘記

記云孔子誦堯舜禹湯文武以教詔來世非必強人所從而君尚於仁臣尚於義士尚於學問禮讓不少過焉者亦率其性導之故樂從焉耳夫教出人性之樂從則學以育其徒廟以妥其靈春秋以時其享若未盡報本之萬一王通曰吾於夫子受罔極之恩嗚呼獨通乎哉國朝設學百年賢才之出江右最盛御史姑蘇韓公雍來巡來撫越今三載民飽暖樂生無所事事樂以餘貲

吉安府志

卷十七

萬安學校

三

為廣廟學之資而萬安禮殿適壞義民曾時望請於公以新為任邑之人士又各有助以經理其餘既而大叅劄澤黃公琛僉憲嚴陵余公復知府江浦張公瑄同心獎督功克用就告成於甲戌中為屋百八十楹而門牆齋廡講藝之堂食息之室與夫庖湏之所以備為器四百八十而簠簋籩豆燕飲之用以具為神像十有五為主百有九而聖哲之神有所依於是訓導冷融邵潤書來徵記惟春秋不書類宮以常事也而以道養民民知聖人之教用新聖人之宮漢唐盛時且不有此謂春秋侯伯有此乎是不可不記以昭公功而記非但紀成而已皇上之育士不專科舉之用公之作興又豈專在觀

瞻之美亦所謂率其性而導之云爾也仁義禮智固非古人之獨有而大學正心修身達之國家天下之教有出吾性之外乎學者博有知天地民物之終始約有習享祀講射之禮遜達有輔俊德神化之休明務有合堯舜禹湯文武化民而成俗者斯有稱翼翼此宮巍巍此堂而皇上文教之敷韓公興學之功不亦罔極無已乎董是役者主簿劉福相之者巡檢譚童夙夜勤勞皆宜書也

天順間驛丞盧華重建樂育堂督學僉事李齡記

記云壬午之冬予奉命提學至萬安教諭周昌訓導王蒙張讓進而言曰萬安處吉之上流儒學在縣治東北

吉安府志

卷十七

萬安學校

三五

山川清淑之氣鍾而為人往往魁竒俊偉出而以功名事業鳴於世者代不乏人焉前是文廟規模隘陋而殿堂齋舍亦各傾圯適欽差巡撫右僉都御史韓公雍謁廟顧瞻嘆嗟思欲聚輿人而新之時有義民魯時望者獨出已貲首營大成殿三間丹堊鮮奕視昔有加又建明倫堂三間於其後輪奐之美足稱其殿而副使余君復僉事宋君儒應君欽行邑乃命有司權其餘積令驛丞盧華專董其功復建櫺星儀門兩齋而梓潼一廟華獨捐俸修理繪畫神像尋委捕寇與知縣徐安縣丞吳紱主簿姜衡秉公協謀凡平民為盜所誣者直之俾出木石磚瓦諸料而助以已財又構樂育一堂於講堂之

後其役經始於天順己卯以某月落成昌等忝教是邑而諸公有功於學如此願祈一言以垂不朽仰惟聖人之道與造化同功故自漢唐以至我朝混一之君咸立廟以崇祀之建學以教養天下英俊而同亮天工為政首務莫踰於是今諸公按臨一方而能惓惓以興學育賢為心可謂急先務而無負於朝廷委任之重矣驛丞盧華以卑職而能盡心殫力稱其任使雖然廟已新矣堂已構矣任師儒者聚諸生於一堂若徒以辨惑解疑馳騁文辭為可樂則非名堂之本意矣要必率之以正心誠意之學導之以忠信之行使夫濟濟青衿環几席而觀聽者莫不遵正學迪正道一旦出而奮庸於時為

吉安府志

卷十七

萬安學校

三

上為德為下為民而措天下於泰山之安則斯道之傳得之者衆及之者廣而其樂為何如哉若夫舍正道以為教曲正學以徼名則不惟有孤諸公興學之盛意而實有負朝廷作養之厚恩矣

成化二十年甲辰布政司叅政秦民悅修大成殿副使陳煒修東西二廡僉事徐懷義民魯時望建戟門教諭

王汝南記

失載

富民謝鼎修儒學門正德間燬於寇鼎子慶復修宏治六年癸丑知縣郭英修廟學樂育堂

十年丁巳縣丞濮奎修殿宇及櫺星門

嘉靖二十五年丙午前令虞守愚來撫江西發金檄縣

大新廟學後知縣劉繼文再修

國朝康熙三年甲辰知縣胡樞修大成殿建兩廡及名宦祠鄉賢祠

按縣志於前明成化年以後重修皆無記而書事亦未合體裁今書四綱並更正

二十六年丁卯知縣黃圖昌增置大成殿神龕五座作倡修學宮引

引畧云風俗之變人心為之也人心之正教化倡之也明教化以正人心正人心以厚風俗此其責不在下而在上昔之聖王慮天下之秀頑雜處無以作其氣而興其行也於是散天下之農於畝畝而聚天下之士於膠

吉安府志

卷十七

萬安學校

三七

庠上自國都下逮郡邑莫不有學陳之以德義陶之以禮樂嚴之以黜陟夫亦可以已矣又懼百家異同羣言淆亂學者罔知折衷也若曰吾欲齊其心志端其趨嚮必使之兢兢焉羣奉一聖人以為師然後可然則學校之設宮牆之麗笙磬俎豆之陳豈必為聖人大觀瞻哉亦欲學聖人者藉是以作其翻然勃然之氣焉爾余謁選得五雲私心自喜曰五雲為吉州名區理學文章代有作者今而後庶得與五雲之賢士大夫倡明絕學以崇聖教乎甫下車謁文廟塵封藓滿內而廊廡外而垣墉存者半而圯者半問司鐸曰貧莫措也問諸紳士曰荒涼久也嗟乎聖教之不崇一至是哉四顧踟躕慨然

太息者久之因簿書多艱未遑修葺然而學校者教化之所自起風俗之所由勵也將聽其棟橈桷折而計畫無復之乎今夫平居相徵逐里巷相慰勞見有家室蕭然風雨弗蔽者不待急聲疾呼猶將扶持而曲量之真斯人之得所而後已况於遊聖人之門沐聖人之澤而坐視黌序之飄搖也其必有怒焉心傷者矣且吾見今之學士大夫而惑焉汨沒於佛老之說溺情於施報之明禮浮屠峻蘭若費金錢以億萬計學校荒蕪曾不之問何重於彼而輕於此也其於過廟生敬之義得無有悖焉者乎今余為五雲人士倡薦紳先生暨爾譽髦多士當必不謬余言

吉安府志

卷十七

萬安學校

三

二十八年己巳知縣黃圖昌增修廟學重建崇聖祠

雍正十二年甲寅知縣施陞錦倡葺兩廡大成門縣丞姚世錫督修邑貢生羅之璋等經費

乾隆九年甲子知縣江伍圖興修大成殿崇聖祠易柱以石補葺兩廡明倫堂文昌宮魁星閣及兩學齋舍巡檢黃廷策督修廩生劉德桂鄉飲蕭崇德等經費

十五年庚午學宮前泮池及牆垣圯於水十六年教諭鄧培蔣倡修

三十二年丁亥知縣胡萬年倡修學廟移建戟門泮池重葺廟門東西二坊教諭萬廷芮勸諭廩生王悉等經費庚寅年竣工教諭趙鳴岐記

記云歲在戊子予秉鐸五雲觀學廟殿閣廊廡規制巍
煥為郡邑黌宮所僅有而泮池又適值創修之時計木
石工費前後共二千金有奇自丁亥八月創始閱四載
庚寅告成諸生屬余為文以記按五雲學宮初建城內
泮街旋移東華觀地至宋邑令趙師道始遷雲岡即今
學也前志所載學基東至蕭直清牆址南至泮池北至
雲岡下岡之上為射圃其東西橫濶三十丈南北直深
五十丈抵太平寺巷由宋歷明規模特備 國朝遞經
修葺而大成門以外多因陋就簡又泮池湫隘不稱體
制形家每言假濠池為泮水形象最吉邑人士雖議改
易而未果前縣令胡公萬年及教諭萬君廷芳銳意移

吉安府志

卷十七

萬安學校

三

建邑廩生王悉溫儀蕭聲清鄒鎮坤等三十人並皆協
力同心於是邑衆樂於急公於乾隆三十二年經始移
建泮池及泮池外門其宮牆兩傍向為疣贅者亦稍稍
擴清前築照牆環砌方圍東西各跨水造橋以通行人
而收瀦白雲山源流之水於內名曰外泮池維時浚深
濠池於塘底中得砌石鱗次環如半月形乃悟前志所
載南至泮池即此濠池其照牆橫長十一丈有奇厚三
尺牆脚倍之深九尺俱用灘石填底出水面始用白石
疊砌至平地又加石砌高五尺濶三尺通高二丈二尺
兩橋各長五丈濶一丈六尺脚深如照牆純用石橋上
俱豎石柱欄杆蓋地勢污下每患洪水衝擊不得不慎

重以蕪堅固余嘗謂學宮之興廢與人文之顯晦相倚
前明萬安豐功偉業學問文章為江右望邑後漸就衰
頽士氣鮮振拔今學廟幸復舊觀將必有其人應運而
興吾願得躬逢其盛焉遂書以答諸生并以相勗云
三十六年辛卯署知縣顧鑑倡修忠義孝弟祠及貞節
祠教諭趙鳴岐督修監生周佑杰等經費
祭器樂器乾隆三十八年修整均同府學
名宦祠祀許浹以後十五人
鄉賢祠祀羅森以後四十七人
忠義孝弟祠祀曾仔以後五十五人
貞節祠祀張某妻吳氏以後一百零八人

吉安府志 卷十七 萬安學校 四十

學額

歲試文生額取十二人武生額取十二人科試文生額取
十二人廩膳生二十人增廣生二十人貢生歲考一人
科考一人

學租

明嘉靖間知縣劉繼文及知縣譚希思置田租四十石贍
學

舊志贍學田租四十石今存三十七石三斗有奇

山租銀七兩六錢有奇儒學每年檢蓋用

又山租銀二十六兩八錢有奇每年徵貯縣庫遇學宮修

理儒學牒詳動用

永新縣學校

永新縣學宋慶厯初始建於縣治東二十步紹興八年戊午縣令趙不愆修十四年甲子縣令牛宏廣其制邑人尹躬為簿佐成之躬記

縣志節錄

記云永新古縣也唐制郡縣有學學有孔子廟永新之學蓋始此我朝慶厯間詔縣士滿百人得立學及廟厥後教養之制有加崇寧間徽宗頒舍法於天下作新人才建炎初學宮圯廢士鼓篋莫適紹興八年趙公不愆為宰於是議建學宮未幾殿堂齋廡廚庫門屏悉具塑先聖先師十哲像繪七十二子之徒俎豆布列復見太平儀禮及牛公宏代至覽學西偏尉司門偏東廡二齋

吉安府志

卷十七

永新學校

十一

未足容衆欲改作而未遑今上紹興十四年議復天下舍法縣皆葺學養士會提刑夏公文提舉學事躬永新人也備員末屬請以學之東圃易尉門增置二齋夏公忻然可之聞於朝命縣按圖鳩工四齋相望既廣且正中外煥然一新而趙公之績牛公之志於是獲成焉牛公命躬為記夫大江之西山高水深吉為之最義山綿延百里川流萬折異材世出史不絕書若姚元之牛思黯劉沖之後先相踵為相下此殆無論已然冲之世永新人按史元之則陝右人思黯隋僕射竒章公後安定鶉觚人二公固寓跡於邑者也今縣東有古墓世傳元之母塋焉北有聰明臺元之築舍其上覽山川勝槩以

博通羣籍思黯之祖自交廣罷官還至柳衡間為土寇所掠思黯方幼與母獲免避入邑西鄉逮長與母舍元之故基積十餘年成學工文母卒塋才德鄉大學里尋遊長安第進士第一武后睿宗元宗朝元之三為相穆宗文宗時思黯亦再為相冲之登進士第二仁宗朝拜中書門下平章事世之相去四百餘年而三相繼盛非邑山川之為助與牛公即思黯之裔其家譜亦載之古者以鄉三物教萬民而六德六行六藝皆教之所有事也然必以聖人為教學之極所謂學始乎為士終乎為聖人又豈特區區名利計哉士能體此而期至於聖人則繼三相而為社稷之臣亦其餘事此自然之明效也

吉安府志

卷十七

永新學校

三

紹興十五年十二月

淳熙十五年戊申縣令柴必勝闢地建講堂及四齋別建興文閣於堂右為射圃於閣東北隅

元至元五年己卯知州完顏瑋倡修馮翼翁記

記云學校之設所以明人倫也視科目之興廢為學者之作輟古未之聞也使不鄉舉里選人倫之道固當明則學校之廢固當修修學校一也或措意於科目方興之日或留心於科目暫廢之後以此扶世教明人倫人心所嚮移固在一舉措間耳永新自混一以來衣冠之胄禮樂之習懷仁義而樂忠信以視後來科興之際人心習俗何如也然黨有庠家有塾有往學無來教今茲

科斲廢人心習俗以視前科興之際又何如矣物窮則變時往必復不有障其波流風靡之漸而進之衣冠禮樂之舊者乎則臨民職教之官皆得其賢斯有相之道也今公之賢適與教官陳質同時其留心學校不以科斲廢為作輟所以明人倫而為人心世教慮甚深矣使予言有驗則後來繼今之賢皆能以新俗美化為務義山禾水衣冠禮樂之復其舊與他日科目得人之盛予尚幸身親見之至元八年歲在庚辰正月之吉

至正六年丙戌知州趙大訥重建廟堂學正喻立記失載

明洪武元年戊申知州田盛謀於守禦千戶俞茂大修廟學擬舉李祁記

吉安府志

卷十七

永新學校

三

記畧云三代之學與軍旅之事未嘗不相關也是以天子將出征必受成於學既征執有罪必釋奠於學以訊馘告蓋學校乃人才所自出受成於是欲資其才以成功及其反也則以成功告此天子之學然而諸侯之學亦莫不皆然魯僖公之作頌宮也詩人頌之其言曰既作頌宮淮夷攸服矯矯虎臣在頌獻馘又曰角弓其觶束矢其搜戎車孔博徒御無數又曰既克淮夷孔淑不逆式固爾猶淮夷卒獲一詩之中反覆咏嘆率皆形容當時軍容武功之盛吾夫子以魯司寇攝行相事夾谷之會却萊人於雍容談笑間三都之墮仲由實任其事魯師及齊將戰樊遲請三刻踰溝齊師卒遁而冉有

以用矛入軍則當時之為師弟子者其能否可見矣自三代之制廢而文武之教遂分千數百年之間習是為常而莫有能推明其故者是可嘆也已永新文學之士由前代及今於江西為盛學校廢弛自兵興以來則然今新安俞公領符來鎮是邦首葺興文閣明年有事禮殿嚴飾像設及從事諸賢闢兩廡移置戟門使殿庭廓然有容櫺星門則改創於泮池之外繚以宮牆既成請記嗟乎學校之不預乎軍旅也久矣今俞公之為是役不以守職為拘侵官為嫌舉積年學校之敝而新之旦朔奠謁進升講堂討論古今肄習禮樂非惟使常布諸生得以從容涵泳於教育之中而介冑之士亦得以踴

吉安府志

卷十七

永新學校

四

躍歆慕於觀感之下將見學校之政與軍旅為一異時人才之由是出者文足以經國理民武足以折衝禦侮則三代之制可以漸復其權輿固不在是歟元年歲在丁未十二月一日

宣德二年丁未署知州柯暹勸邑人蕭可道捐建大成殿大成門兩廡自為記

失載

景泰五年甲戌都御史韓雍按縣勸蕭可道子夔復建明倫堂遷譚烈婦祠於學西南邑僉事劉儁記

記畧云上嗣位之明年春大江以西民有弗靖特勅都御史姑蘓韓公雍以便宜治事明年至吉之永新爰戾學宮顧舊宇制庫不足以居學徒詢知邑倅新安胡佑

賢材堪任事命以新之首得義士蕭夔等助金若干兩
倡焉於是年之二月首作明倫堂翼以東西之齋峙以
藏書之閣六月工訖落成公以雋為邑人俾為文勒諸
石惟三代之學皆所以明人倫也故治隆俗美後世罕
儷秦挾山西雄強畢六王欲帝萬世劉氏一呼關門不
守鹿死衆逐繇詩書廢而教學不立也漢孝武世祖皆
孜孜儒術表崇學校延於靈獻運去世遷天下尚知尊
漢雖有強橫不敢即去臣位繇二君務學以啓之也永
新舊有學始備於宋慶厯間雋嘗閱考圖志謂廬陵八
邑惟永新學先立邑人士往依山林講肄者一時來聚
其學先德行而後文藝宋季紛亂丞相文信公起兵勤

吉安府志

卷十七

永新學校

五

王以此出永新書約彭震龍為應震龍結諸豪傑一時
並起據城誓守元兵所過各城乞降不暇獨永新執義
不屈至力竭城陷甘心就死無一人降者是皆教學之
結於人心久且專也我朝學校遍天下風俗軼三代矧
求新家漸人染習成性者茲得賢都憲作新於上良有
司仰承於下學宮一新來學之士得以羣居族處學古
人之學踐古人之跡居官臨政者於無事之時談道德
而服仁義以淑人心設遭事變尤當仗大節而振綱常
求無忝所生無愧於前人斯不負聖朝建學之意我公
崇獎之美矣景泰甲戌夏月

成化三年丁亥知縣李愷建櫺星門及學號舍

四年戊子分巡陳騏行部至委官重新大成殿兩廡戟門大理卿夏時正奉勅巡視檄同知黃景隆助成大學士商輅記

詳縣志

九年癸巳副使陳煒至命修兩齋及教諭廡

二十三年丁未知縣馬崑勸張寧修興文閣臨江知府沈榮記

失載

正德五年庚午縣丞朱相白叅政周津以贖金令邑人史玘董修文廟并兩廡

嘉靖二十八年己酉知縣徐衍祚勸張寧子萬濬修興文閣鄒守益記

記云永新興文閣在儒學明倫堂之後成化間邑令馬

吉安府志

卷十七

永新學校

四

侯克昌屬義民張寧創構割田為歲葺計嘉靖甲午邑之薦紳甘子公亮李子儼率諸生舉惜陰大會而徐侯丙主之相與切偲於閣中煥然壯也歲久滋敝己酉夏均州徐侯衍祚蒞邑修復之而義民之孫萬濬偕其姪曰朴曰應堯克紹祖志而任之規制宏麗視昔費倍焉以辛亥夏告成於侯侯請於中丞張公柱史曹公以獎厥義而趙子暨其寮章子文瀾鄴子驥謁言以紀成績且曰文之敝久矣請以尊經易之東廓子益曰無以易也諸師諸生其粵稽文王之文乎穆穆敬止亦臨亦保演羨里樂辟雍顯西土以光四方洙泗源流錯綜不齊有以約禮對則曰博文有以力行對則曰學文而上律

下襲錯行代明是天之與斯文而大成也正學不傳往
往并文學而眩之詞藻註述是飭是崇而孝弟謹信判
不相關况望洗心齋戒以神明其德乎好古之士慨然
厭文之敝而欲易之孰若會人文之大成使庶民興而
邪慝息耶帝降之衷精明純粹無有歆羨無有畔援蒸
民與文王所同也善學者以兢業葆厥貞生而全之全
而歸之無所待而興以順帝則是謂豪傑不善學者以
逸豫滅厥德舉之弗勝行之弗至而諉曰上無以倡也
是謂凡民凡民之與豪傑非昏明強弱殊也有志無志
之辨而已矣世固有博文強識而躬行未得其蔽也華
而蕩有篤志力行而不著察其蔽也實而支有探性命

吉安府志

卷十七

永新學校

四七

測元妙自以為極深研幾矣而脫畧細行批駁聖言其
蔽也高而虛雖清濁殊科其未免歆羨畔援均也諸師
諸生其敬念之哉誕登於岸蕩蕩平平陳蔡之厄亦羨
里也杏壇之樂亦辟雍也將居上居下處順處逆無攸
往不利而况一科第之多寡一爵位之隆卑又烏可以
淆吾經天緯地中耶永新為吾吉名邦節義功烈先哲
炳炳邇來從事良知之訓耆舊俊髦環橋門而聽者勃
勃焉茲復得良師帥貞教以萃渙振頽而迪顓民相訓
飭祇承德化繼自今詠歌泮宮駿奔文廟升堂以陟閣
高明廣大心曠神怡皇皇焉志於豪傑而不忍出凡民
下庶幾無負爾良師帥之望嘉靖二十八年

三十一年壬子文廟災邑人尹臺徙邑西南與知縣朱賢馮符先後倡捐修建尹臺羅洪先各有記

尹記云三代之盛自天子至於庶人莫不以學為本務故學校之建繇國都達乎閭巷其制彬彬備矣其時吳楚之邦介在要綏之外先王聲教所鮮及况壤接乎江嶺之僻者學校之政惡能概然並施之則其民之安於簡陋不可程督宜先王莫能遽變之矣天地生人風習久而漸開今吳楚人文蔚然宣炳於四方即詩所稱王國多士未能或之盛者聖人在上德教涵漬之效豈人力也哉吾永新昔列吳楚之壤所謂接乎江嶺之僻先王聲教所鮮及者也廟學之建肇自宋慶厯間前此蓋

吉安府志

卷十七

永新學校

四

未聞有興舉之者矣夫學校士之肆也士居之以成業其建樹胡可無慎擇也往學舊宮據邑西南諸水之會風氣閎盤士業於是賢材號稱不乏今代遠地易水渠壅廢形家每以為病士藝絀修科第屢間癸丑之春廟忽燬不可無議改卜也於是巡按御史吳公遵聞而重念之檄縣俾計其可令長朱侯賢爰諏衆志以臺常相邑西南隅舊為監司行解者中敞外密岡支委伏山川儲靈人文宜茂報上吳公是之廼筮日庀材採築全集不數月而文廟成乙卯春祀先聖於新宮其秋二士並薦明年春登進士第一人厥兆示昌士類胥悅已而吳公代去朱侯尋亦召入工弗迄竣巡按御史徐公紳繼

至迺屬今令長馮侯符俾鳩度迺成馮侯受令降觀周
揆攷勢正方廟更其向增其址加崇二尺有羨堂視廟
升三之一廉辨級施左右廡序以嚴以翼已而櫺星之
門敬一之亭啓聖名宦鄉賢之祠靡不煥然飭新齋寢
庖溜門廬牖與靚邃穹豁咸登其制官師獻奠陟降有
次講肄游息有舍前承楔綽後引度閣周垣外繚砥道
中貫恢然通邑之偉觀矣役始甲寅秋繼成迺事則自
丁巳夏迄戊午春創構時迺大備蓋巡按二公倡作嘉
成於上邑長二侯必始勤終於下賢績其庸可忘於是
徐公撰書屬臺以記將推前作者之休美而自遜以弗
與也臺惟事因人立功以時究非知政之先重者不足

吉安府志

卷十七

永新學校

四九

與成於教化之務吾邑雖三代以前載籍未有所稱紀
然上下二千年間計其民之朴茂秀穎可振古賢士之
業者豈鮮迺其材不一顯用於先王之世豈非學校之
政偏而或未之興耶夫三代建學欲專成士之材德使
咸適於治已治人之道達諸家國天下無弗理焉耳是
故道莫大於人倫教莫先於禮樂人倫明而百姓親禮
樂用則庶事順是先王教化之大端也我聖祖立國首
申三代建學重師之義皇上惇倫紹極列敷言以示彝
訓其欲成士之材使咸躋三代之道化何其盛歟惟士
能自立於人倫禮樂之道教然後不負上之所作成其
要在擇術知慎而已孟氏矢函之喻不既深切痛至矣

乎顧舊學弗稱後先大吏暨邑長令昕夕矻矻不少懈
幸擇地之善以居夫士矣乃士自居其身不知所慎擇
焉可乎夫本其知能之良廓之於人倫禮樂之大以成
其材而自進乎治己治人之道是擇術之善皆非由外
得者自今吾邑士講道論業歌遊出入於此學必俛焉
孳孳慎求而弗止怠則出而履衆職之任列百官之中
頽然不失其材之成庶幾家國天下之理可賴其輔翼
不匱斯固二三君子改學興教之盛心抑士所以自成
乎學不愧其治己治人之道者也嘉靖甲寅秋月 羅
記云古之為士非獨有師承足以相觀而善也亦上之
人擇地而居之者周物備制弗敢苟焉其勢不得不自

吉安府志

卷十七

永新學校

五十

勉也蓋籩篚劍壘以習其禮者必有升降奠獻之位琴
瑟勺象以和其樂者必有舞蹈搏拊之次工詩書之文
則誦說諷詠之有其羣操射御之器則馳驟縱送之有
其處而又絕商賈以別其類環辟泮以異其宮使耳目
不雜而心知明嗜好不撓而志意廣蓋其居業也專則
其成材也大盡其引翼夾輔之力於學者靡有不至所
以使其入而孝弟恤睦行於家出而仁義聖知用於國
無弗宜也然則古之多士與士之貴於世者豈偶然哉
政教廢有司視學校為不急其能畢心力者蓋鮮往予
道永新望學宮在邑之左敝壞不稱因訪今吏部侍郎
尹公臺舉以詰之則曰地宜失利兼之市井囂雜欲宅

徙而未得吉也未幾始議改卜尹公躬為相宅得部使
廢署輪廣深袤可營庶揆言之知縣朱侯賢上請於巡
按御史吳公遵分巡僉事馮公臯謨於是士民爭捐其
金若干二公下議助以公醵肇基於甲寅七月明年乙
卯文廟成遂作明倫堂已而吳公受代朱亦赴召丁巳
御史徐公紳至屬今知縣馮侯符竟其工督率則主簿
陳璞戊午七月遂告成八月上丁馮侯率教官包子一
夔項子勲沈子汝文暨諸生釋奠於廟庭階廉辨駿奔
有儀尊簋牲帛區別以式退而登堂鐘鼓間作考業說
書衿珮顛若如遊三代之澤宮祠馨宗而聽雅樂也徐
公聞而樂之而諸生曠效忠李子惠來乞言竊以古者

吉安府志

卷十七

永新學校

五

道化不可遽復而其激勸鼓舞之機未始不存今羣公
之於學也懼耳目穢雜而徙之既有合於古者擇地備
制之意而馮侯繼事不憚更置之勤亦曰使居者安其
序而久其業將行於家用於國者其尚有賴則庶幾古
之教也嗚呼上之畢其心力者若此居者其亦有思乎
歲時之間莫謁飲射必於斯詠歌遊息必於斯課業校
文藝必於斯曷亦省曰吾之俯仰進退以為禮也果可
交神明而事長老抑亦有慢易玩忽之心否與吾之淡
洽倡和以為樂也果能養性情而滌滓穢抑亦有怠肆
宴溺之氣否與吾之請益問難以從事於業文即稱引
古誼商確時難幸不甚認將處於鄉居於位者果能不

負所學抑亦有富貴利達之懷否歟有是穢雜而弗之
從其如群公何雖然今之從事業文者未有能雜耳目
嗜好以為之蓋不待持久而冀速化則尤不可以無專
亦其勢然也古者環辟泮以為之宮得使學者思不出
位以養其心知而達其志意耳目雜好莫能得而撓焉
所謂禮樂示之者蓋其師承之道也今業文者藝而已
雖然古之誦說詠歌納言而颺之其去業文也宜無甚
異而其成材乃有古今之別其故何居將所謂師承之
道非耶夫業貴專道貴自得無變今之業而有得於道
入而宗族孝弟可稱出而朝廷仁義可法是即古之成
材國家賴以廣道化也羣公之望已乎惟有志者共圖

吉安府志

卷十七

永新學校

五

之嘉靖戊午冬月

萬曆四年丙子知縣龔錫爵出贖鍰建興文閣於明倫
堂後尹臺記

詳縣志

萬曆間知縣余少原徙建廟學於治東

國朝順治戊戌知縣王登錄修賀鳳生記

據記增補

記畧云永新地僻而遠界連吳楚之衝乙酉以後署其
地者一歲而數遷相率為因循苟且之計屹屹頻宮幾
化為荒草斷碣雖文廟幸存然亦蕩搖將就圯矣癸巳
春古趙王侯登錄以丙戌進士來蒞茲土未浹月大兵
即壓境侯經營慘澹以靜制動以簡御煩一切興除之
事不急急於旦夕而務與民為休息故繕城堡葺公廡

建倉廩以次落成侯始進學博曹傅二君而言曰文廟之修其在今日乎試與邑紳士共謀之庀材鳩工始戊戌冬迄明年六月告竣重丹疊翠視昔加麗於是曹傅二君偕邑紳士以余不佞與侯有一日知備書其事介余言為記余嘗考邑乘所紀載廟學之役自宋元迄明凡經數更而始善當時名卿碩輔以文章經濟焜耀史冊者志云備矣若劉友益賀善顏山農賀中男金光弼賀鳴祥之數君子者雖生不同時然其品行著述皆彬彬大雅之遺豈非聖教之涵濡仁義之所漸被不以地之僻遠而少遜也哉余既副諸君之請而樂有是言又懼來者之不獲如侯也遂鐫諸石

吉安府志

卷十七

永新學校

五

康熙二十一年壬戌知縣王運正捐俸重葺自為記記畧云永新地連荆楚萑苻竊據學宮鞠為茂草辛酉冬予司牧是邑目擊頽殘旦暮圖維欲為國家作樹人之計必先取聖哲之式靈學士之仰止者綢繆妥侑俾耳目未新者藉以鼓舞之意氣不張者從而振興之但四境初平物力告匱問之公帑不能索之民篋不可用捐俸貲鳩工庀材棟樑維舊而椽題新焉地勢是宜而坊級固焉門楹祠祀整理而丹雘之配享從祭分晰而位置之罔侈前規毋嗇後觀後之君子倘聞風而踵美焉庶幾其常新矣乎

二十五年丙寅知縣趙作霖重修自為記

詳縣志

三十六年丁丑知縣夏之時增置齋舍

五十三年甲午知縣張景齡捐倡重修廟學增高大成

殿址自為記

詳縣志

乾隆二十八年癸未知縣唐廷槐修自為記

記畧云新邑素號相鄉秋山義嶺蜿蜒西南琴水艾川襟帶左右由宋迄明巍科顯宦史乘不絕書謂非數百年涵濡於學校中者深乎考學宮原坐東關前明嘉靖中葉曾移西南不數紀仍徙故址然規局卑隘位置失宜無以妥聖即無以育才余自下車以來惓惓焉欲覓而新之歲癸未闔邑紳士呈請改建適合余願於是申詳各憲節府試路費作學資不足則賫冊於四鄉而勸

吉安府志

卷十七

永新學校

五

輸焉於是移其基址廓其規模數月間雕甍插漢畫戟連雲工雖未竣已駸駸乎大有可觀矣詎余因他故挂吏議解組去仍需次都門而首事郵書至以工成問記於予予既喜愜予素願也又幸士生山水秀靈之地讀往代賢哲之書相漸以道誼相蒸以禮樂諒有出而為國家用者余且拭目待之

祭器樂器乾隆四十年監生尹文廣捐置俱與府學同

名宦祠祀陳省躬以後十八人

鄉賢祠祀蕭儼以後五十一人

忠義祠祀賀泰以後三十人

節孝祠祀段哲妻吳氏以後六十一人

學額

原額入學文生員十五名武生十名廩膳增廣各二十缺
乾隆九年分文生員額三名武生額二名廩膳增廣各
三缺歸蓮花廳學

學田

萬曆四年丙子知縣龔錫爵捐置學田百七十石有奇邑

人劉朝噩記

記年
乙亥

記畧云吾邑學舊無田有田創自今石巖龔侯始侯令
予邑旦望進諸生於學宮推明古六德六行六藝導之
以經術以考其實亦甚勤矣間與諸博士鄉大夫慨然
於古今之際以為今養士以廩餼既有所拘弗能周士

吉安府志

卷十七

永新學校

五

之遺於所養益多矣夫士誦法孔孟固不期上之養而
後思奮勉於學獨所謂資富能訓上之責果安在哉是
吾所不敢朝夕懈者於是斥金售田百七十石有奇畀
之學惟士之賢以充於貧而隳其學者甚衆非必所食
之艱其婚喪俯仰固累之過半今舉夫聘弗能婚喪弗
能塋歲祔弗能為養者則量其田入之多寡以施之其
施之無以周周之無以徧則後之師帥是邦者必有
慕義以興所謂非一人可為者吾特為之倡焉爾凡司
是田者無以食先事無以利先義則厥成克永濟嗚呼
觀公之所措畫其愛推於士也厚義結於士也深而又
必人人皆同己之所欲為則其教而養之豈獨在田云

爾哉抑有勸之道焉萬歷乙亥冬十有二月

永寧縣學校

永寧縣學在縣治西始建於明洪武五年壬子知縣蕭文斌後知縣趙裕建兩廡十五年壬戌主簿朱厚增修宏治三年庚戌知縣馬鉦大新之王臣記失載
正德嘉靖間知縣陶膺陸時雍熊欽張節唐宗陶謝元光相繼修葺聶豹記

記云永寧故有儒學圯而不修四十年矣乃嘉靖癸巳熊侯特請於上撤其故而新之而大備其費則科於公帑得贏金若干以不足復捐俸倡民又得金若干肇工於癸巳之八月越明年四月十九就緒也歸然改觀而

吉安府志

卷十七

永寧學校

五

寧之校至是始可與吉之諸邑稱先是甲午春予與東廓鄒子暨九邑諸友會講於郡之青原山侯嘗肅庠生謝某周某尹某徵記於山中予未有以報也丁酉臘月新令至丕承厥烈亦惟於學政是謀乃復戒三生速予言予曰嘻諸生其知所以為學乎我朝以舉業造士崇理學也理學大明於宋故談理之文無慮百家而足以詔後世繼絕學者篇凡有四曰易通曰定性書曰西銘曰易傳序今之業舉子者有一於此乎有一於此乃珠晦而驥逸焉謂為有司之罪宜也而世嘗慮夫有一於此者之未易得也蓋四子之文四子之學也是豈可以摹擬藻飾為哉是故持格剛方如伊川守理嚴密如橫

渠學者苦其入而難之或然矣乃無欲主靜之教大公
順應之學皆原人心本體之易簡日可見之行也日可
見之行而文生焉是謂天下之至文如易通定性書佐
佑六經卒為百代殊絕之見光天下以為瑞蓋不但係
一方盛衰云也而世每厭其易簡以為不足為而日沾
沾焉循格守度以取必於有命之得及其不振而遂誘
罪於山川之數有司之不明是豈侯之所望也侯姓熊
欽名桂之臨桂人新令覃潯陽人也名煦邑博南海林
滋江浦吳麟董役勤勞則義官某俱於法得書

萬曆七年己卯知縣倫天秩改建縣治左史翊記

記云寧在吾邑西南其岡巒雄峙秀接義禾而川源滌

吉安府志

卷十七

永寧學校

書

迴又與禾川琴亭諸水環合滙注士產茲鄉樸茂俊穎
談詩書敦尚實行視吉郡諸邑淳龐殆未斷焉舊有學
在縣治之西地勢淺隘陰陽向背失宜議者以為非昌
熾之徵謀欲遷而未遂適順德倫侯來令茲邑政先大
體以興學育才為首務朔望禮先師進諸生講誦已而
校藝品隲仰而嘆曰邑非人才不足之患而士氣之未
振得非儲英之地有未宜乎乃環視邑之境內相其地
勢平曠山川秀結風氣攸萃得縣治之東舊解一所躍
然喜曰是足以妥聖靈而儲育髦士矣請諸代巡邵公
守巡胡公唐公太守楊公咸允所議乃捐其俸資以倡
之而邑民之慕義者亦樂為助經始於萬曆己卯之冬

越明年庚辰秋工告竣凡廟之為殿為廡為門學之為堂為齋為號舍翼然改觀敬一有亭聚奎有樓名宦鄉賢有祠凡位置名物有關於學者罔有不飭視其基則隘者拓而宏矣視其位則卑者尊而崇矣視其材則腐者易而固矣規制軒豁偉麗出塵囂而挹清曠人之襟懷瞻視不自知其暢且適也樂其成者入而問之侯侯曰非吾之能吾民之好義所致出而問之民民曰吾侯為之而吾不知也即舉而質諸士士曰民之言然於是庠士謝生秉巽陳生懋典謂侯嘉惠之功不磨時學博陳君命索記於予予曰茲舉也其寧庠丕振之一機乎夫聖人之道昭然如日之中天士羣處於學宮而以六

吉安府志

卷十七

永寧學校

五

經之道迪而訓之欲其明大倫崇正學識治體探化源以成士君子之行以豫公卿百執事之選而人才之盛衰俗化之厚薄於茲焉繫然士必有忠信之質而後可以進道必鼓舞作興而後轉移有機焉寧士渾樸未鑿真淳未漓衣冠之胄於禮樂之習彬彬焉矣而倫侯又為之更置學基宏遠其規模而昭曠其氣槩固時與事會機與天合者也士於此必感激思奮爭自濯磨瞻廟貌而深仰止之思覩堂奧而懋優入之志藏修息游日取聖賢六經之旨體而玩之精思力踐卓然以真才自期待時而蜚英騰茂則隨其所至懷仁負義不愧為名卿大夫即未遇而好修自重亦思以孝悌忠信不失為

士君子之行茲固寧多士美質所優為而實倫侯棧樸
作人之化可適觀厥成者信哉斯文丕振之一機也詩
曰清廟奕奕奚斯所作孔曼且碩萬民是若請以是為
倫侯誦又曰彼都人士狐裘黃黃其容不改出言有章
行歸於周萬民所望因以是為庠士勗焉倫侯諱天秩
號惇五粵之順德人登隆慶丁卯進士潔已愛民懋著
廉平之譽其德惠之洽浹於民者最深建學特其一端
云

崇禎間邑令陸起龍學訓鍾鳴時改建今地明末兵燬
國朝順治十七年庚子知縣閔士樟因舊址倡復康熙十
二年癸丑知縣楊顯宗建明倫堂十三年甲寅兵燬知

吉安府志

卷十七

永寧學校

堯

縣陳欲達修南昌熊一瀟記

記畧云吉州文獻名區自宋以來商皇史冊指不勝屈
鄭溪屬吉僻地也我朝定鼎登進士第自鄭溪始竹
林甲乙相繼甚矣地之不可囿也然永寧苦兵燹遭寇
氛蹂躪者七年黷宮傾圮壁椽垣牆僅存形跡廓蕪不
治齋舍蕩然歲庚申仲春邑侯陳公欲達膺受茲土謁
廟思敬憮然曰庠序誠造士育賢之地講學肄習為士
之肆進庠之士而問曰向之經始者幾何人營創者幾
何年士歷舉以對且曰前之選形勝者自上海陸公起
龍瑞金鍾學博改建於斯翼翼其新秩秩其序諸無不
備未幾而際改革燬者存者僅得規模順治十七年五

臺閭公士樟來治是邦亟謀興復文廟之未備者得倪公德基勸告厥成嗣是而明倫堂啟聖祠則又成於今康熙十二年邑侯楊公顯宗大其規制崇閣數仞視昔功倍甲寅迄今兵戎交訌蓁莽愴心陳公授事甫閱月以學宮規制未復念茲勿釋又得江南副府王公顯若羅公得勝皆合陳侯之心而留意宮牆葺補大畧庀工月餘而兩戎使報鶯遷矣陳侯悵然於懷自去秋迄今春稔於籌畫曰寧庠宜復吾分也第時勢維艱欲醵金錢則正供尚逋於民間瘡痍方起欲征力役則又重困吾赤子爰集兩學博謀曰吾當拮据而圖以期落成必如昔之翼翼其新秩秩其序方為得之遂捐貲重整規

吉安府志

卷十七

永寧學校

六

模煥然即戟門櫺星泮池牆垣未有關畧且蒞任以來奉行儒圖之法俾士子得勤業於詩書而不苦差徭是則侯之造士育賢敦重庠序至無已也余從子學麟司鐸鄭溪邑之紳士屬厯叙其由索記於予以誌陳侯之績余曰善政善教陳侯兼有之綱舉而目張何必過為之辭即所述鐫之碑石垂之永久殆將合前令而先後一轍焉是亦不忘教澤之意云爾

雍正五年丁未知縣張曉申請捐貲購民土而拓新之正殿前列露臺兩翼為東西廡戟門泮池櫺星門東聖域門西賢關門自為倡建引

引云按邑乘邑之學宮始自明初及崇禎年間復改建

今地迨季年灰燼無餘我朝順治庚子前任閩公鼎建仍新址甲寅後兵毀之康熙壬戌前任陳公修葺如初其間興廢不一大要以時為盛衰壬寅冬余奉簡命令茲土每登學宮即以湫隘衰頹為憾國家盛治遠紹唐虞寧雖小邑學宮實為育賢之地固宜輪奐爽塏茲之湫隘衰頹甚非所以尊先聖而資講習也昔者康節居洛洛之士重其人故富公與司馬公諸君子二十餘家爭出錢買宅以贈今寧之重孔子奚啻洛之於康節寧好義之君子又奚啻二十餘家誠使赴事者以後羞集錢者以少愧則安見衆功之不易舉也又嘗考邑乘我朝定鼎吉之登進士者自寧始則寧固代有

吉安府志

卷十七

永寧學校

三

傳人况今之人士涵濡聖澤既久躋躋蹒蹒於他邑漸無多讓豈人文既盛而學宮終聽其湫隘衰頹也者斯舉也余與諸士民固無容諉詩曰肇禋迄用有成又曰長發其祥余固於諸士民有厚望焉

十年壬子教諭黃光旦倡修文昌閣今改尊經閣閣後齋署正殿後左建崇聖祠廂房右為明倫堂齋署居其後堂西有虛受軒鄉賢名宦忠義三祠列其前節孝祠在名宦祠後知縣劉德清記詳縣志

明倫堂知縣劉德清書聖經一章自為記

記畧云寧邑諸生修建學宮工竣之後敬書聖經於明倫堂甬壁之上首事復求余為記余曰聖經之書原欲

使學者咸知修身齊家之要治國平天下之本是不可
以不記我孔子上承列聖之真傳下開萬世之道統危
微精一之旨不外誠意正心之學諸生縫掖其衣自無
不當以聖賢之學自命然或一日之間玩愒中乘既不
能明德又何望新民余忝為邑宰竊有風勵之責敬書
聖經蓋欲使諸生登其堂三復之絕玩愒之漸遠淫匪
之黨杜悖亂之萌定靜安慮至於有得皆能盡格物致
知誠意正心之學則身無不修家無不齊國可治而德
可明於天下矣

祭器樂器俱與府學同

名宦祠祀蕭文斌以後十四人

吉安府志

卷十七

永寧學校

奎

鄉賢祠祀鄒祐以後十一人

忠義祠祀宋義士謝彥昇等

節孝祠祀節婦李氏以後九人

學額

歲試額入文生八人武生八人科試文生八人廩膳生二
十人增廣生二十人每三年歲貢生二人

學田

學田四石一斗租四十石五斗內除完糧十五石實收二
十四石坐落一保六江魚塘三口學租倉屋一所

卷十七終

